

四庫全書

集部

欽定四庫全書

集部

粵西文獻卷六十七

詳校官庶吉士臣瑚圖禮

主事銜臣徐以坤覆勘

總校官庶吉士臣朱鈐

校對官中書臣王鍾泰

謄錄舉人臣劉禮

欽定四庫全書

粵西文載卷六十七

桂林府通判汪森編

傳

遷客

東漢劉熙字成國北海人博覽多識名重州黨建安中
薦辟不就避地交州往來蒼梧容授生徒數百人乃即
物名以釋義惟揆事原致意精微作釋名二十七篇熙

自為序其時有程秉字德樞南頓人少明周易詩書逮
事鄭玄得其奧秘後避亂交州與熙考論大義遂博通
五經士變命為長史孫權聞之以禮徵辟拜太子太傅
後卒于官所著周易摘尚書駁論語弼凡三萬餘言又
有薛綜字敬文沛郡竹邑人世典州郡為著姓綜少明
經善屬文舉秀才漢末大亂乃依故人避地交州從劉
熙學士變既附孫權召綜為五官中郎除合浦太守治
郡威惠並行民獠愛之轉守交趾時交土始開刺史呂

岱率師討伐綜與俱行事畢還都守謁者僕射赤烏三年徙左都督尋為選曹尚書太子太傅六年春卒所著詩文名曰私載

三國虞翻字仲翔餘姚人少好學有聲太守王朗命為功曹已歸孫策策亡事權權既為吳王歡宴之末自起行酒翻伏地佯醉權去翻坐起權大怒手劍欲擊之大司農劉基起抱權力諫免他日權與張昭論神仙翻又忤權權積怒徙翻交州及遣周賀等往遼東求馬翻聞

之以為去人才以求馬既非利國而遼東絕遠恐無獲
欲疏未上以示呂岱為人所白復徙蒼梧猛陵後賀等
還至戌山為魏人所殺權始思翻言召之會翻卒以其
喪還翻雖處罪放而講學不倦門徒嘗數百人註老子
論語國語傳於世翻有十一子第四子記知名

晉董京字威輦元帝咸元間避居橫州登高嶺秋夜泛
舟見一仙乘槎而來賜以血食

唐柳奭字子邵解人貞觀中累遷中書舍人外孫為皇

后遷中書侍郎進中書令皇后挾媚道覺罷為吏部尚書后廢貶愛州刺史許敬宗等構與通宮掖謀行鴆毒與褚遂良朋黨罪大並遣使殺之沒其家眷以上親並流嶺表與房隸桂州為奴婢神龍初乃復官爵子孫親屬緣坐者悉免開元中柳渙為中書舍人上言臣從伯祖與去顯慶三年與褚遂良等五門同被譴戮雖被原雪而子孫殆盡唯曾孫無忝客籍龔州陛下先天後詔書嘗任宰相家並錄其後況臣之伯祖無辜被誅今蒙

寔未還後嗣僑處願許伯祖歸葬孤孫北遷於是詔無忝護輿柩歸鄉里官給喪事無忝後歷潭州都督

薛仁貴龍門人為雞林道總管坐事貶象州會赦還帝思其功乃召見拜瓜州長史右領軍衛將軍檢校代州都督率兵擊突厥元珍於雲州突厥問曰唐將為誰曰薛仁貴突厥曰吾聞薛將軍流象州死矣安得復生仁貴脫兜鍪見之突厥相視失色下馬羅拜稍稍遁去仁貴因進擊大破之

褚遂良散騎常侍亮之子累官吏部尚書同中書門下
三品永徽六年高宗將廢皇后王氏立昭儀武氏為皇
后遂良極諫不可帝謂李勣曰冊立武昭儀之事遂良
固執不從遂良既是受顧命大臣事若不可尚且止也
勣對曰此乃陛下家事不合問外人帝乃立昭儀為皇
后左遷遂良潭州都督顯慶二年轉桂州都督未幾又
貶為愛州刺史明年卒官

杜正倫洹水人顯慶元年遷中書令封襄陽縣公初正

倫已通貴李義府官尚微及同執政不能下中書侍郎李友益義府族也晚附正倫同據義府釁缺義府使人告正倫友益交通罔上有異計高宗惡之出正倫為橫州刺史流友益峰州正倫卒於貶

韓思彥字英遠南陽人為御史出為江都主簿又徙蘇州錄事參軍罷去上元中召見思彥久去朝儀矩梗野拜忘蹈舞又詆外戚擅權后惡之中書令李敬玄劾奏思彥見天子不蹈舞負氣鞅鞅不可用時已拜乾封丞

故徙朱爲丞遷賀州司馬卒

張大安繁水人上元中爲太子庶子時章懷太子在春
宮令與洗馬劉納言等注范曄後漢書光宅中出橫州
司馬卒

蘇潯武功人佐御史中丞張九齡爲判官

李嗣真字承胄栢水人永昌初御史中丞時來俊臣獄
方熾嗣真上書諫以爲昔陳平事漢祖謀疎楚君臣行
反間項羽遂亡今殆有如平者謀陛下君臣恐爲社稷

禍不納出為潞州刺史俊臣誣以反流藤州久得還自筮死日豫具棺斂卒桂陽有詔州縣護喪還鄉里

崔玄暉安平人以誅二張功為中書令博陵郡王罷政事王同皎謀誅武三思事洩三思誣玄暉桓彥範敬暉袁恕已張柬之同逆陰令許州司功參軍鄭愔上變乃貶玄暉白州司馬桓彥範瀧州司馬敬暉崖州司馬袁恕已竇州司馬張柬之新州司馬悉奪勲封三思又疏韋后隱穢榜於道請廢之帝震怒三思狠曰此殆玄暉

輩為之流玄暉古州道病卒彥範復徙灤州遣御史周利用往窮其事遇於貴州遂被害

宋之問字延清汾州人偉儀貌雄于辯甫冠武后召與楊炯分直習藝館累轉尚書監丞左奉宸內供奉于時張易之等寵甚之問傾心媚附及敗貶瀧州參軍逃歸洛陽匿張仲之家仲之與王同皎謀殺武三思之問令兄子曇與冉祖雍上急變因乞贖罪由是擢鴻臚主簿天下醜其行景龍中遷考功員外郎諂事太平公主故

見用及安樂公主權盛復往諧結故太平深嫉之中宗
將用為中書舍人太平發其知貢舉時賕餉狼籍下遷
汴州長史未行改越州長史睿宗立以獫狁惡詔流
欽州祖雍歷中書舍人刑部侍郎倡飲省中為御史劾
奏貶蘄州刺史至是亦流嶺南並賜死桂州之問得詔
震汗東西步不引決祖雍請使者曰之問有妻子幸聽
訣使者許之而之問慌悸不能處家事祖雍怒曰與公
俱負國家當死柰何遲回邪乃飲食洗沐就死

周利貞神龍初擢侍御史詣附權彊五王等疾之出為嘉州司馬武三思亂禁中五王謀誅之私語崔湜湜反以其計告三思五王貶湜勸速殺之以絕人望問誰可使以利貞對利貞湜內兄也表攝右臺侍御史馳嶺外矯殺敬暉桓彥範袁恕已還拜左臺御史中丞先天初為廣州都督湜陷劉幽求謫嶺表諷利貞殺之賴桂州都督王暕護而免利貞頗事剝削夸獠苦其殘虐皆起為寇詔監察御史李全交按問得贓狀貶涪州刺史開

元初詔利貞酷吏宜終身弗齒尋復授珍州司馬明年授今州刺史黃門侍郎張廷珪執奏謂利貞宗武舊黨鉏戮桓敬自陛下遷之遐荒義士猶以罰輕為望今錫以朱紱委以藩維是絀姦不必行也疏入遂寢未幾復授黔州都督廷珪又表還制書玄宗乃止會廷珪罷起為辰州長史朝集京師與魏州長史敬讓皆奏事讓暉之子也以父冤越次而奏曰周利貞希姦臣意枉殺先臣暉惟陛下正罰以謝天下左臺侍御史翟璋劾讓不

待監引請行法玄宗曰訴父之枉不可不矜也朝廷之儀不可不肅也奪讓俸三月復貶利貞邕州長史未幾與薛季昶宋之問同賜死於桂州驛

薛季昶為荊州長史因附五王貶儋州司馬初季昶與昭州首領周慶立廣州司馬宗楚客不叶懼二怨不敢往歎曰吾至是邪即仰藥死葬昭州

韋陟字殷卿萬年人襲郇國公坐事貶守鍾離義陽後為河東太守以失職內怏怏乃毀廉隅頗餉謝權倖欲

自結天寶十二載入考華清宮楊國忠忌其才謂拾遺
吳彤之曰子能發陟罪乎吾以御史相處彤之乃劾陟
饋遺事貶桂嶺尉坐不行徙平樂肅宗即位起為吳郡
太守

于邵字相門萬年人天寶末進士以諫議大夫知制誥
進禮部侍郎朝有大典必出其手為三司使治薛邕獄
失德宗旨貶桂州長史

任華為桂管觀察使李昌巖參佐其詩文尚奇

齊映瀛州高陽人貞元二年拜平章事時張延賞罷相
為左僕射數畫時事令映行之及為所親求官映多不
應延賞怒言映非宰相器三年正月貶映夔州刺史又
轉衡州七年授御史中丞桂管觀察使

楊憑登建中進士累官京兆尹中丞李令簡劾奏憑陰
事謫臨賀尉

李涉渤之仲兄與渤俱隱廬山嘗自五羊來寓桂有喜
弟渤至及別南溪等詩

韋宗卿李渤客日隨渤宴遊作隱山六峒記

戎昱寶曆間桂府衛伯玉辟為從事有早秋及臘月歲暮詩

劉栖楚為右拾遺後為京兆尹諂宰相厲色慢辭韋處厚惡之出為桂管觀察使卒

劉蕡字去華昌平人明春秋能言古興亡事太和二年春三月文宗親策制舉人自元和之末宦官益橫建置天子在其掌握威權出人主之右人莫敢言時蕡以賢

良方正舉對策極言其禍考官散騎常侍馮宿等見黃
策皆歎服而畏宦官不敢取裴休李邵杜牧崔慎由等
二十二人中第皆除官物論囂然稱屈李邵曰劉黃直
第我輩登科能無厚顏乃上疏乞回臣所授以旌黃直
不報黃對後七年有甘露之難令狐楚牛僧孺節度山
南東西道皆表黃幕府授秘書郎以師禮禮之而宦官
深嫉黃誣以罪貶柳州司戶參軍卒於柳墓在城西五
里及昭宗誅韓全誨等左拾遺羅衮上言使黃策早用

則杜漸防萌逆節可消寧殷憂多難遠及聖世邪枉魄
憤背誠有望於陛下帝感悟贈賁左諫議大夫訪子孫
授以官

李商隱字義山河內人嘗依桂管觀察使鄭亞為判官
多所著述

李珣字待價開成中以戶部侍郎同中書門下平章事
始莊恪太子薨帝意屬陳王既而帝崩中人引宰相議
所當立珣曰帝既命陳王矣已而武宗即位人皆為危

之遷門下侍郎為文宗山陵使會秋大雨梓宮至安上
門陷於濶不前罷為太常卿終以議所立貶江西觀察
使再貶昭州刺史宣宗立內徙郴舒二州

孔溫裕宣宗時為補闕以諫討党項羌謫柳州司馬

李羣玉嘗自五羊來桂林訪故人舊居有一院蕉聲暮
半庭春影斜之句

歐陽賓嘗居桂遠宦而歸舊居已廢有詩

盧順之因張固守桂來依有同宴永東觀及獨秀峰詩

韋待價宰相挺之子也以得罪流放繡州詠歌之聲達於戶外

楊衡吳興人游桂與陳羽念別有云碧桂水連海蒼梧雲滿山之句

鄭畋字台文為刑部員外郎劉瞻為宰相薦授戶部郎中入翰林為學士俄知制誥瞻以諫忤懿宗罷為荆南節度使韋保衡又與路嵩共譖瞻貶康州刺史畋草制曰安數畝之居仍非已有卻四方之賂惟畏人知嵩謂

叟曰侍郎乃表薦劉相也與韋保衡論其附下罔上懿
宗甚怒責之曰叟頃以形迹玷穢為時棄捐朝籍周行
無階踐歷竟因由徑遂致叨居塵忝既多狡蠹尤甚且
居承旨合體朕懷一昨劉瞻出藩朕豈無意爾次當視
草過為美詞逞譎詭於筆端寵愛憎於形內徒知報瞻
歎唾之惠誰思蔑我拔擢之恩載詳言偽而堅果明同
惡相濟人之多僻一至於斯宜行竄逐之科用屏回邪
之黨可梧州刺史僖宗立內徙以右散騎常侍召還

韋保衡咸通間以右拾遺尚同昌公主二歲餘入相又
歲餘貶為賀州刺史留意吏事不以舊宰輔自居

柳璧字賓玉華原人桂州觀察使李璿辟掌書記璿所
行多不法璧屢規止之不聽乃拂衣去

陸鴻休為桂管觀察使楊漢公從事有宴遊嘗家洲詩
陶英字世民世為青州人累官太尉天祐二年上書言
事指斥時政忤朱全忠因授太尉征南將軍領兵八萬
出鎮昭州故以疎之明年全忠篡位英懼禍隱於誕山

家焉同時有李太尉者簪纓相似子孫累代締姻其山下有洞因目為陶李峒

宋洪湛字惟清上元人以右拾遺直史館端拱初與左正言尹黃裳馮拯右正言王世則宋沆伏閣請立許王元禧為儲貳詞氣狂率太宗怒時沆坐呂蒙正親黨已出為宜州團練副使上因語近臣曰儲副邦之本朕豈不知但近世澆薄若立太子即東宮僚屬皆稱世官職聯次與上臺無別人情深所不安此事朕自有時爾乃

出湛知容州容有戍卒謀竊發者湛偵知斬之遷比部員外郎徙知郴州改舒州咸平二年召還

胡旦渤海人淳化中知制誥坐王繼恩累流謫潯州旦以狀元進身喜讀書雖在謫地著書三百餘卷鑿大硯方五六尺刻曰胡旦修春秋硯

石普幽州人為桂州觀察使遷節度使時方崇尚符瑞而普請罷天下醮設歲可省緡錢七十餘萬以贍國用由是忤帝意祥符九年上言九月下旬日食者三又言

商賈自秦州來言哨廝囉欲陰報曹瑋樞密使王欽若言普欲以邊事動朝廷帝怒詔除名貶賀州

周敦頤字茂叔道州人慶厯中遊西粵寓於潯

程顥字伯淳程頤字正叔皇祐間父珦知龔州二夫子從父宦讀書暢嵒受業於濂溪先生

石元孫字善良後儀人以守信蔭累遷鄜延副都總管緣邊安撫使康定初夏人寇延州元孫與戰于三州口軍敗見執傳者以為已死贈中正軍節度使兼太傅錄

其子孫七人及元昊納款縱元孫歸諫官御史奏元孫軍敗不死辱國請斬塞下賈昌朝獨言前代將臣敗覆而還多不加罪帝乃貸元孫安置全州

唐璘字伯玉古田人治平十年進士為監察御史彈擊無所避再疏鄭清之庸妄誤國子士昌招權納賄鄭性之懦而多私黨庇奸庸李鳴復甘心諂鄭損得薦入朝疏上諸權奸切齒會杜範亦論鳴不行而範去璘遂力劾外左遷廣西運判

吳及字幾道靜海人為右司諫以勁正稱遇事無大小
輒敢盡言後因增興國軍鐵冶為學士胡宿所劾知廬
州復出知桂州卒

劉恕字道源筠州人善說經義尤精史學熙寧初為桂
管經略司勾當公事與陸詵遊伏波山

范祖禹字淳甫華陽人元祐中為翰林學士聞禁中覓
乳媪祖禹以帝年十四非近女色之時上疏勸進德愛
身又乞宣仁后保護上躬言甚切至既而宣仁諭祖禹

以外議皆虛祖禹復上疏言外議雖虛亦足為先事之戒凡事言於未然則誠為過及其已然則又無所及言之何益陛下寧受未然之言勿使臣等有無及之悔拜翰林學士宣仁太后崩中外議論洶洶人懷顧望在位者畏懼莫敢發言祖禹慮小人乘間害政乃復上奏章累上不報時紹述之論已興有相章惇意祖禹力言惇不可用不見從遂請外補乃以龍圖閣學士知陝州言者論祖禹修實錄詆誣又摭其諫禁中崔乳媪事連貶

武安軍節度副使昭州別駕安置永州賀州又徙賓化
而卒

范寥字信中華陽人慷慨重義嘗以省叔父祖禹還寓
桂林天寧寺時黃山谷謫宜州贈以詩云范侯來尋八
桂路走別俗人如脫兔其後山谷歿於宜寥往護喪出
嶺士夫義之

章惇貶雷州經貴縣寓南山流連不去嘗與僧翫景歎
云夏雲多奇峰良不誣也寺僧奉恕因以詩諷之

許德言元祐中以龍圖閣學士安置賓州

蘇軾字子瞻眉山人士紹聖初惠州安置嘗謂嶺南無大寒盛暑民居其間衣食之奉終歲一律居三年貶瓊州曾弟子由謫雷州同道藤州徽宗立徙永州還廉與鄭靖老曰某留此過中秋或至月末乃行至北流作竹筏下水歷容藤至梧與子邁約令搬家至梧相會道藤江下對月有作登浮金亭曰愛此小天竺時來中聖人後至永更三大赦還

王鞏長於詩從蘇軾遊軾得罪鞏亦竄賓州數歲得還
留怙字彥強西安人元符間與府帥黃忱同遊龍隱

秦觀字少游一字太虛高郵人少豪雋慷慨溢於文詞
登第歷秘書省正字兼國史院編修官紹聖初坐黨籍
出通判杭州以御史劉拯論其增損實錄貶監處州酒
稅又以謁告寫佛書為罪削秩徙郴州繼編管橫州又
徙雷州徽宗立復宣德郎放還至藤州出遊華光亭為
客道夢中長短句索水欲飲水至笑視之而卒先自作

挽詞其語哀甚讀者悲傷之年五十三

黃庭堅字魯直姓黃氏其先娶之金華人後居洪州之分寧治平中兩首鄉薦遂登四年第紹聖中知舒州又召以為吏部員外郎辭疾不拜上章乞郡得知太平州到官僅九日而罷管勾洪州至隆觀寓居江夏先生風流洒落胸中恢廓初無恩怨談笑嘲謔或以忤物蓋嘗忤趙丞相正夫而庭堅不屑也庭堅往嘗作荊州承天院塔記轉運判官陳舉承風旨采摘其間數語以為幸

災謗國遂除名編隸宜州雖被橫逆未嘗一語尤之浩然自得也以崇寧元年至宜僦居於城西黎氏嘗書手帖貸錢米於人時黨論甚嚴士大夫例削剗掃迹獨宜倅余若著為之經理舍館敬遇不怠且遣二子滋許從之遊零陵蔣緯與庭堅友善日陪杖履殊不畏黨禍越四年庭堅有南樓之厄余若著謂庭堅無愧東都黨錮諸賢請書范滂傳於壁庭堅乃默憶而書之既成僅誤二字忽有詔徙永州未行疾且革蔣緯至見庭堅大喜

握手曰身後事屬君矣是歲九月三十日卒壽六十有一漳為棺殮具舟送還宜人被其休風多景慕之至作亭以祀其像且刻其手帖於石用以為法嘉定間權宜州事張自明為建龍溪書院以風後進且祠而祀之范正平字子葵純仁子以事獲罪蔡京及京當國言正平矯撰父遺表又謂李之儀述純仁行狀妄載中使蔡克明傳二聖虛寧之意逮送御史府不勝捶楚賴克明辨釋正平羈管象州之儀羈管太平州

鄒浩字志完晉陵人為右正言賢妃劉氏立浩言立后以配天子安得不審孟氏罪廢之初天下孰不疑立賢妃為后及讀詔書有別選賢族之語頃年冬妃從享景靈宮是日雷變甚異今宣制之後霖雨飛雹自秦告天地宗廟以來陰浮不止上天之意豈不昭然望不以一時改命為難而以萬世公議為可畏追停冊禮如初詔行之帝謂此亦祖宗故事豈獨朕邪對曰祖宗大德可法者多矣陛下不之取而效其小疵臣恐後世之責人

無已者紛紛也帝變色猶不怒持其章躊躇四顧凝然
若有所思付外明日章惇諷其狂妄乃削官羈管新州
徽宗立亟召還復為右正言遷左司諫兵吏二部侍郎
以寶文閣待制知江寧府徙杭越州初浩還朝帝首及
諫立后事獎歎再三詢諫草安在對曰焚之矣退告陳
瓘瓘曰禍其在此乎異時姦人妄出一絨則不可辨矣
蔡京用事素忌浩乃使其黨為偽疏言劉后殺卓氏而
奪其子遂再謫衡州別駕尋竄昭州五年始得歸

張廷堅字才叔廣安軍人為右正言是時議者往往指
元祐舊臣在廷者太多廷堅為帝言司馬光呂公著之
賢又薦蘇軾蘇轍可用頗忤旨曾布因稱其所論不當
帝命徙為郎俄出為京東轉運判官改通判陳州初蔡
京守蜀廷堅在幕府與相好及京還朝欲引以為己用
令鄉人諭意廷堅不肯往京大恨列諸黨籍又坐嘗談
瑤華非辜事編管虢州再徙鼎州象州久之復故官

鮑由字欽止處州龍泉人嘗從蘇軾遊故其文汪洋闊

肆詩尤高徽宗召對除戶部員外郎以不合去轉廣西
轉運判官

米芾字元章吳人崇寧間由書畫博士為臨桂尉放懷
山水任滿寓西山資慶寺與詩僧紹言游有贈紹言詩
序

龔夬字彥和瀛州人登進士為殿中郎御史論章惇蔡
卞之惡又論蔡京上誣宣仁之罪又上疏乞正元祐后
冊位號崇寧初元祐后再廢言者論夬首尾建言詔削

籍編管房州繼象州

周弘易崇寧間佐武郎擢武德大夫由寧遠徙居恭城
見縣西平坡中一山亭亭直上遂卜居讀易名曰翠微
峰即今之西嶺寨也

徐俯字師川黃庭堅甥崇寧間庭堅謫宜州俯來視其
舅舅卒遂寓居昭州紹興中除諫議大夫有訪鄒道鄉
故居詩并序

黃葆光字元暉黔人為左司諫政和末歲旱葆光上疏

劾太師蔡京疏入不報且欲再上章京權勢震赫舉朝
結舌孫光獨出力攻之京懼中以他事貶知昭州立山
縣又使言官論其附會交結泄漏密語詔以章揭示朝
堂安置昭州

許子紹字季紹歷陽人監左藏庫時欲得太常丞時相
抑不用乃出為靜江府通判藻思輕雋有留題龍隱詩
尚用之宣和間任提刑後寓桂水東石佛真教二寺南
來諸士夫樂與之遊喜獎勸後進卒葬興安子孫因占

籍於桂

劉珏字希范長興人宣和中金人攻吉州分兵追太后舟至太和縣衛兵潰珏奉太后退保虔州言者論不已貶衡州紹興初許自便卒於梧州

王安中字履道陽曲人進士及第仕州縣至御史中丞靖康初鬱林州安置嘗有詩曰宦遊梅嶺外訟折榕庭空尋放自便卒其子孫因家於鬱林

李邦彥字士美懷州人靖康元年執政無所建明時人

目為浪子宰相二年以主和誤國割地與金人罪安置
潯州後北歸卒於桂

趙良嗣本燕人馬植世為遼國大族仕至光祿卿行汚
而內亂不齒於人政和初童貫出使道盧溝植夜見其
侍史自言有滅燕之策因得謁童貫與語大奇之載與
歸易姓名曰李良嗣薦諸朝即獻策曰女真恨遼人切
骨而天祚荒淫失道本朝若遣使自登萊涉海結好女
真與之相約攻遼其國可圖也徽宗召見嘉納之賜姓

趙氏以為秘書丞圖燕之議自此始遷直龍圖閣加右
文殿修撰宣和二年二月使於金國見其主阿固達議
取燕雲使還進徽猷閣待制自是將命至六七頗能緩
頰盡心與金爭議既得燕山官至光祿大夫良嗣願致
仕三上章詔不許既而朝廷納張覺良嗣爭之云國家
新與金國盟苟如此必失其歡後不可悔不聽坐奪職
削五階靖康元年四月御史胡舜陟論其結成邊患敗
契丹百年之好使金人侵凌禍及中國乞戮之於市時

己竄柳州詔廣西轉運副使李昇之即所至梟其首徙妻子於萬安軍

呂好問字舜徒希哲子崇寧初治黨事以元祐子弟坐廢司揚州儀曹時蔡卞為帥欲扳附善類待好問特異好問終不阿合及卞得政卞風之親我即階顯列好問笑不答建炎中避地於桂寓石佛寺其子本中侍行

呂本中河南人公著曾孫以文學為樞密院編修官建炎中嘗避兵寓賀州後召為起居舍人

吳敏字元中真州人大觀二年辟雍試首選蔡京喜其
文欲妻以女敏辭之擢司浙東學事建炎初移柳州用
范宗尹薦起知潭州辭免常遊桂林城外南禪寺多遺
墨

趙子崧宋宗室號鑑湖居士建炎初以不合執政貶龔
州未幾放令自便道梗未能歸寓於潯先是宣和間館
職有常壞者謂子崧曰夜夢帝勅公為白石洞天主者
在潯喜遊白石後竟歿於潯

曾幾贛州人號茶山居士建炎初避地於潯嘗有詩云
雞犬圖書同一舸老夫蕩槳兒扶柁潯江一繫欲生根
夢下湖南向江左

路允迪南遷寓桂林日接後學訓解義理嘗謁泮宮作
詩及他著作甚多

陳與義洛陽人官太學博士避亂遊襄漢間轉徙寓賀
州紹興初召還遷中書舍人

李光宇泰發上虞人吏部尚書參知政事時秦檜初定

和議將揭榜欲藉光名鎮壓上意不欲用光檜言光有
人望若同押榜浮議自息遂用之光本意謂但可因和
而為自治之計既而檜議撤淮南五守備奪諸將兵權
光極言和不可恃備不可撤檜惡之檜以親黨鄭億年
為資政殿學士光於榻前面折之又與檜語難上前因
曰觀檜之意是欲壅蔽陛下耳目盜弄國權懷姦誤國
不可不察檜大怒明日光丐去高宗曰卿昨面叱泰檜
舉措如古人朕退而歎息方寄卿以腹心何乃引去光

曰臣與宰相爭論不可留章九上乃除資政殿學士知
紹興府改提舉臨安府洞霄宮中丞万俟卨論光陰懷
怨望責授建寧軍節度副使藤州安置越四年移瓊州
又移昌化論文考史怡然自適年踰八十筆力精健以
郊恩復左朝奉大夫任便居住至江州而卒孝宗即位
復資政殿學士賜諡莊簡

胡銓字邦衡廬陵人紹興五年以賢良方正召對除樞
密院編修官八年宰臣秦檜決策主和金使以詔諭江

南為名中外洶洶銓抗疏言王倫秦檜孫近皆可斬書
上檜以銓狂妄忤鼓衆劫持除名編管昭州後乾道
中以資政殿學士致仕卒諡忠簡有澹庵集

蕭燧字照鄰臨江軍人紹興進士授平江府推官時秦
檜當國其親黨密告燧秋試必主文潛臺燧詰其故曰
丞相有子就舉欲以屬公燧怒曰初仕敢欺心邪檜聞
而銜之因易一員以往調燧靜江府察推而歸

劉昉字方明潮州人先侍父兄在桂官邸昉時尚幼不

及游諸山最後從蜀還潮泊舟伏波山下乃自題伏波
山志其事

折彥質紹興間謫海外經桂林寓西山寺有訪訾家洲
諸詩

尹穡紹興間避地寓鐵牛院有譙樓福興藏仙李崑諸
記

孫覲紹興間謫象州寓桂林喜其山水作十詠

劉長歷忠肅公孫避地寓碁盤寺紹興初復用元祐子

孫除開封守暫攝潯州子芮為湘州判官長歷歿不能
葬還殯西山觀音寺及芮為永州司理復寓桂林時有
賦秦城王氣詩媚時宰者惟芮與李燮羅博文不賦士
咸服其操

洪興祖字慶善丹陽人知饒州時秦檜當國諫官多檜
門下爭彈劾以媚檜興祖坐嘗作故龍圖閣學士程瑤
論語解序語涉怨望編管昭州卒明年詔復其官直敷
文閣

劉洪道岳飛重其才辟為參謀有戰功紹興中飛死洪
道謫柳州

高穎紹興中參福建安撫司坐從岳飛謫象州固窮守
節剛直之性怡然不渝

汪應辰字聖錫玉山人時秦檜力主和議應辰上疏謂
和議不諧非所患和議諧矣而因循無備之可畏異議
不息非所患異議息矣而上下相蒙之可畏檜大不悅
遂請祠歸張九成謫邵州交遊皆絕應辰時通問趙鼎

歿應辰為文祭之衢州守章傑希檜意指為死黨檜欲
竟其事以胡寅言而止然竟銜之通判靖江府踰期不
得代流落嶺嶠十有七年檜死始還朝

楊獬字正伯清江人名在棲霞洞臨江志稱其有學行
為其鄉後學所師法

趙不尤宋太宗裔靖康之難募義兵與金人戰皆捷河
南北盜亟避其鋒曰此小使軍也高宗即位引眾歸補
武翼郎從岳飛平湖寇飛死檜奪其兵遣刺橫州

劉子羽崇安人安撫司參議紹興四年坐富平之役為
言者所論謫白州建寧山堂杜門讀書寡酬接會蜀帥
吳玠上疏論子羽功請納節贖罪詔聽子羽自便尋復
原官秦檜風言官論之復罷與祠卒

呂撫齊州人丞相頤浩子官朝散郎貶梧州司戶秦檜
追憾頤浩再竄滕州撫雖在貶所以詩書自娛絕不知
遷逐意

韓璜為右司諫與樞密富益柔善益柔薦之秦檜數忌

益柔由是與璜俱罷謫璜監潯州酒稅

孫偉謫融州寓桂林日久與劉開州父子蔣穎兄弟游
惟以講學為務桂林學問之源自偉始

吳元美福州人紹興中為福建安撫司機宜坐鄉人鄭
璋告其作夏二子賦譏時宰又謂其家亭號潛光有心
於黨李堂名商隱無意於事秦秦檜惡之編管容州
士從學甚眾嘗遊勾漏山作寶圭十洞記尋卒容人建
勾漏書院祀之

趙夔紹興間南遷北歸常寓正悟寺遍游桂林有二十四峒歌

程祐之伊川先生從孫紹興間避地寓桂林之永寧寺後帥五羊今子孫墳墓俱在桂林

胡寅字明仲崇安人中宣和進士因詆王安石追謫章蔡誣謗宣仁后紹興二年徙於全

沙世堅連水軍人紹興間補義勇軍統制為同列所誣流海外破黎賊有功經略李浩拔隸帳前復其官後張

弼帥桂辟以自隨經略劉煥苦留之適妖賊李接起容
南嘯聚蟠據煥邀世堅統率諸軍生擒李接盡降其衆
以全功轉四官除本路副總管召至闕下引對稱旨除
果州團練使知宜州

仇愈字泰然益都人第進士累官陝西都轉運使時金
人無故歸侵疆計叵測愈力陳非策秦檜方主和議謫
愈居全州

王洵友知建康嘗罪秦檜族黨安置藤州鄭玘有嘲謔

講和之語竄容州

傳自得懷州人知興化軍謫融州杜門讀書無復仕進意宰相陳康伯奏得自便乾道間復故官泊如也

林光朝字謙之莆田人南渡後以伊洛之學倡東南者自光朝始年五十登進士累官國子司業是時張說再除僉書樞密院事光朝不往賀遂出為廣西提點刑獄梁安世字次張括蒼人屏風嶠有安世詩彈丸巖賦乳牀賦安世在桂與徐夢莘最友善

孟浩字養直宜春人與徐夢莘同時在桂同修鄉里會
袁志稱其廉介為文有法度先是奉新有王從言辟桂
憲幕亦與其同時諸人游龍隱品其字曰師孟

李孟傳字文授李光子也歷官太常丞考功郎韓侂冑
與孟傳故嘗致意孟傳謝曰行年六十去意已決侂冑
慙而退左遷知處州復遷廣西提點刑獄

姚宋佐字轉之桂陽人有詩名曾在桂與劉愈泛舟西
湖

張忠恕字行父宰相張浚之孫以祖任入府幕時韓侂
冑權勢薰灼嘗奪民間已許嫁女夫家以告忠恕白尹
歸其父母尹不能難調廣西轉運司主管文字

李如圭字寶之吉水人與臨江劉正之豫章黃銖宴集
龍隱正之字公權如圭正之後皆有聞魏郡子羽時亦
在坐

趙孟邁字君啓曾與陳鐸諸人遊龍隱南安志載孟邁
知南安軍有患愛

程松字久老青陽人慶元中韓侂冑用事吳曦為殿帥時松知錢塘縣諂事曦以結侂冑極意獻媚侂冑累遷同知樞密院事自宰邑至執政纔四年開禧元年以資政殿大學士知成都府四川制置使侂冑決議開邊期以二年四月分道進兵命以為宣撫使興元都統制吳曦副之尋加曦為陝西招撫使許便宜從事松將東軍三萬駐興元曦將分軍六萬駐河池松至益昌欲以執政禮責曦庭參曦聞之及境而返曦納款于金獻闕外

四州地求為蜀王有告曦叛者松哂其狂未幾金人封
曦為蜀王曦遺松書諷使去松不知所為會報金人且
至百姓奔走松亟望米倉山遁去由閬州順流至重慶
以書抵曦丐贍禮買舟稱曦為蜀王曦遣使以匣封致
餽松望見大恐疑其劒也亟逃奔使者追及松不得已
啟視之則金寶也松乃兼程出峽西向掩淚曰吾今獲
保頭顱矣曦誅詔落職降三官筠州居住又責果州團
練副使賓州安置死於賓

趙興權字悅道鄞人曾與翁子東諸人遊辰山後立朝
有清直名

柯夢得字東海莆田人以善楚辭為其鄉方信孺所知
曾從至桂信孺請其為撰先運判崧鄉祠迎送神曲

胡夢昱字季昭吉水人寶慶初以大理評事上書言濟
邸事援晉太子申生漢戾太子及秦王廷美事為說忤
史彌遠意御史李知孝附彌遠劾之羈管泉州卒後人
過其處指曰忠直之居夢昱與胡銓同邑人稱小澹菴

曾原一字子實寧都人博學工詩在桂與趙希圃輩同遊諸山結江湖吟社所著有選詩衍義蒼山詩集

楊允恭字謙仲長沙人為道州教授曾在桂從李曾伯遊龍隱

郭顯者不知何所人居桂南溪之劉仙窩一稱住山道民一稱南溪郭顯然卒無可蹤迹之者獨有南溪卜居銘首言士大夫以金人之故多南遷似避地中言志在神仙似方士末言榜揭歸去又似棄官入山者

吳億字大年蘄春人灘江之水月洞及龍隱皆有所篆
俱自稱為谿園居士

元文升宋末丞相天祥弟璧之子也信國死難以升為
嗣後仕元海北廉訪使卒葬於鬱林之八壘岡子孫遂
家於鬱今有文丞相祠其裔諸生文運熙者尚藏明初
解學士縉書公上已詩以貽廉訪子良錫云

額森鼎泰定間為儲祥院使天厯初臺臣言其所至擅
殺官吏俘略子女貨財刑部鞫之獄成杖而竄之南寧

籍其家

楊舜民字子春蜀人登元進士任清湘縣丞至正間避兵靜江嘗作新城碑記暨逍遙樓上

張志道醴陵人任海北遂溪縣簿元末寓靜江嘗以春秋授學者

劉三吾字如孫茶陵人元鄉貢進士任永平教諭至正甲午避兵靜江平章額爾濟訥擢主本路學正陞提舉一時從遊者甚衆

劉恢字志道常寧人元末避地靜江為宣成書院山長
有學行竟以老終

王偉字士徽長沙人寓靜江德行純謹工於五言長律
明胡純字希一平陽人仕元為翰林供奉洪武初謫居
桂林閉戶却掃潛心性理之學都督韓觀嘗造其宅不
報謝觀再至謂曰先生於觀似無情者純曰將軍知我
我固如此所謂士伸於知己者觀歎息而去

李文仲桐廬人洪武六年以吏部員外謫藤州同知文

章政事蔚然有聲卒於官士民悼之

羅時周易大年俱江西人同謫馴象衛十五六年與丁顯周禹文譚翼輩討論性理商榷古今一寓之於詩更唱迭和數公竟卒於貶所

向璇進賢人洪武十八年進士歷官應天府尹建文時坐累謫廣西靖難後復官

潘長壽洪武中以僉都御史謫知潯州府政尚寬平勤於撫字雖谿峒犴獠亦皆感化

譚翼字南宿大庾人洪武乙丑進士授龍溪丞未仕會
星變求直言翼應詔建疏語涉諸王高廟怒曰此又為
葉居升邪葉居升者平遥訓導嘗諫諸王毋練兵得重
罪遂謫翼戍馴象久之徙奉議與潯人講學賦詠者四
年建文二年起知龍溪未就道晉車駕郎中與黃練相
籌議靖難師至不屈赴火死妻鄒氏子仕謹皆相繼死
潯人聞而哀之

杜伯恭泰郵人洪武間由國子生出知武緣有循良風

以言事謫戍馴象衛與丁顯輩為莫逆交後膺薦剡得
歸

丁顯字彥偉建寧人洪武乙丑進士及第第一人以言
事謫戍馴象衛

周禹文香山人洪武乙丑進士官御史坐事謫戍馴象
衛

王度字子中歸善人洪武中以明經薦為御史糾繩不
避權要建文時北兵起李景隆敗度密陳便宜被讒稍

疎斥靖難兵南下益急度募兵勞軍比鳳陽失守方孝孺與度書誓死社稷壬午秋七月戊寅縣千戶所坐語不遜論死夸其族

蔡運南康人起家貢士歷官四川參政清勤直諒不諧於俗罷歸起知賓州有惠政遜國時祝髮隱會稽雲門寺因稱稽山主人

解縉字大紳吉水人洪武戊辰進士永樂間為翰林學士直文淵閣時上方用兵交趾公力言交趾古羈縻國

通正朔時賓貢而已得其地不足郡縣上遂疎公出為
廣西參議尚書李至剛奏公怨望改交趾寓藤州石壁
之水月嵒盤桓旬月藤人士多從之學傳惟宗最洽家
有手書猶拾襲珍焉

俞得儒浙江人永樂中以御史直言出知賓州十餘年
士民懷之

鐵福安鉉之子也靖難兵起鉉屢挫其鋒及成祖登極
縛至殺之罵不絕口謫其子福安戍河池州

薛巖閩鄉人為大理寺卿坐累謫戍廣西永樂初安南國王為黎季犛所殺其孫陳天平自老撾來歸季犛于蒼表請還國立之上命總兵官黃中以兵五千送之還中以巖往至芹站伏發劫天平巖被擒死之

饒藝字士中臨川人工詩畫永樂間寓居平樂既歸昭人慕之以遺墨為重

黃讓字用遜蕪湖人景泰中為御史時門達用事橫甚讓嘗因事笞其所遣人達怒令偵者撫其所役聽事人

為賊謫戍廣西會赦乃還

劉敬字子欽吉水人為刑部主事坐累謫戍南丹因阨
中處之裕如無幾微隕獲態人稱其賢學士曾榮薦之
起為新淦學訓

何楚英字邦佐南海人天順初以御史謫貴縣簿興利
除害尋擢知本縣進本府同知仍掌縣事修學校葺城
池建縣廳益有政聲以才能遷秩去官至廣西參政
楊瑄字廷獻豐城人為御史論曹吉祥石亨二凶上怒

詔獄謫戍鐵嶺道遇赦還或謂公宜詣二凶謝公不可
復謫南丹衛二凶誅召還歷官浙江按察使

劉規四川巴縣人舉進士成化間以御史謫判鬱林親
賢去奸一時推重

王坦平原人舉進士成化二十一年以給諫謫北流主
簿時縣猶全設坦以邑小員冗為民蠹疏裁丞簿徭賊
出沒民輒流亡設策防禦練民兵巡守寇盜屏息

閻鼎成化中以浙江道御史謫平南縣簿剛直不阿為

政寬猛得宜砌城濬池興利除害卓有聲譽

沈政字以正常州人以太常少卿謫梧州推官後寓桂林卒善詩畫至今珍之

楊榮永川人成化間以御史謫知天河縣愛民造士人咸思之

譚仕演字四我南海人僑寓岑溪喜山水嘗遊秋風崑得白象之勝入居之崑故多虎人咸畏懼演竟與周旋鮮有所害演在崑採木實以食或十餘日不入村市人

傳以為奇

詹志文孝感人弘治間舉人左遷蒼梧典史久之歎曰
與其縻祿以屈人孰若自樂遂棄官去

孟洋字望之信陽人正德間以御史坐言梁蘄相國謫
桂教授洋喜吟諷其詩清逸峭厲時顧璘從開封謫全
州兩相倡和

曾熒麻城人嘉靖間以都給事抗疏謫靈川典史

張臬進賢人嘉靖間山東參政解送試錄犯諱謫靈川

典史後歷陞兩廣都御史

馬錄字君卿信陽人嘉靖初為御史按山西有張寅者
為人告妖賊錄窮治之寅素事武定侯郭勛乃賂勛使
遺書解之錄得書具以聞上眷勛貫不問反移寅獄於
三法司會勘獄上悉如錄指上復疑有黨令張學士孚
敬等廷審勛素以議禮迎孚敬意遂直勛寅得脫前法
司勘官皆得罪去錄坐廷杖戍南丹衛錄居戍歲久絕
口不言往事竟卒戍所

程文德字舜敷永康人嘉靖間乙丑進士以編修謫信
宜典史兩廣督撫陶諧禮致文德於蒼梧主嶺表書院
諸生從游者衆植竹院後作棲鳳臺擢令安福累官大
司成

趙貞吉字孟靜內江人嘉靖間官諭德兼御史檇師大
將軍仇鸞鸞銜之遂被譖謫荔波典史道病留全州入
湘山讀書僧舍居久之以病謝去

吳時來字惟修仙居人嘉靖間劾相國嚴嵩父子貪黷

為嵩所擠下獄戍橫州嵩敗召還官至都御史

董傳策字元漢上海人為刑部主事見吳時來上書劾
嚴嵩父子扼腕而歎曰可令吳君獨當此乎會同官張
紳至語合即各具疏劾嵩已而並下獄論戍傳策戍南
寧間過橫興時來游邕橫人士多從者後嵩敗召還官
至南京禮部侍郎

耿定向麻城人嘉靖間以御史督學南圻興大學士徐
階善及高拱柄政上考察科道疏諸與徐善者貶斥幾

盡高去位公補橫州判官尋召用歷戶部尚書

劉臺字國基安福人萬厯間以御史論輔臣張居正侃侃五千餘言居正銜之逮詔獄罷歸居正恨未已嗾江西撫按誘其仇家誣奏他事文致其獄謫戍潯州公入潯博士家爭嚮之亡何公暴卒二蒼頭繼卒卒之日與居正同日時人皆異之居正敗賜贈蔭潯州有專祠

何喬遠官儀部謫布政司經歷

王休休官銓部謫鬱林州同知

曾偉芳官兵部謫賓州判官

陳楚產官兵部謫鬱林州判官

吳文梓官都給事謫崇善縣典史

周希聖官御史謫灌陽縣典史


張集義餘姚人進士萬曆二十四年以兵部主事謫橫
州判一月回部三十年復謫捐俸錢為課文費未幾還
部

范周江南人進士累官至憲副左遷平樂府同知二載

恬淡自如遇佳山水輒吟咏見志去後士民思慕之
鍾行旦字不夜四川筠連人崇禎副榜博學善文詞知
荔浦值流寇猖獗公募丁壯守禦民賴全活陞雲南屏
州未任卜居荔浦之筆村

嚴起恒山陰人真定籍崇禎辛未進士歷任廣州知府
湖南監司所至多惠政後僑寓南寧值滇賊肆劫南太
恒恐為所害赴水死經三日屍逆流而下至青山崖下
虎負屍起兀坐山麓衣冠儼然面色如生次早土人經

過即見其兀坐處土墳隆起高數尺矣人咸以為鬼神
厝葬云



粵西文載卷六十七